

LA ARLeF E PRESENTE “LENGHIS”

Il gnûf sît internet par imparâ la lenghe furlane a scuele

Il furlan al à une oportunitât di plui intal insegnament a scuele, in graciis dal gnûf sît “**Lenghis-Ladint (Laboratori didattic interatîf)**”, nassût de colaborazion fra Claap – Centri di linguistiche aplicade Agnul Pitane e **ARLeF** – Agenzie Regionâl pe Lenghe Furlane e presentât, che nol è tant, ae presince dal president de Agenzie, Eros Cisilino, e di Patrizia Pavatti, dirigjente dal Uffici scolastic regionâl.

Il proget, ideât e coordinât di **Adrian Cescje**, al met a disposizion dal insegnament de lenghe furlane un strument pensât di pueste pe didattiche plurilengâl, basât su di une

plateforme digjitâl (<https://lenghis.me>), flessibil dal pont di viste dal so ûs didattic e economic, stant che internet lu puarte in ogni scuele e in ogni cjase in maniere svelte. Nol è dome une plateforme di condivizion di materiâi didattics, ma al ufrîs cors specificis e aprofondîts di didattiche.

Lenghis al è duncje une **Biblioteche digjitâl** e un **Laboratori di esercitazioni linguistichis** par une o plui lenghis in rapuart mutuâl, pensât in forme multimediâl,

cun tescj, imagjins e vôs. La Biblioteche e pues contignî tescj di gjenar e di tipologjie diferents; e pues jessi inricjide cence limits e difondude inte rêt a disposizion di ducj chei che a vuelin doprâle e e pues jessi ancje personalizade di un utent singul. Il Laboratori, che al è inserît intune “lavagne” pes esercitazioni, al è un “gjeneradôr” di unitâts di ativitâts o di esercitazioni variis par ogni test.

La pussibilitât di movisi tra vocabolari, traduzion, scolte, variantis locâls, lenghe comune e struments didattics e coventarà par cjapâ plui cussience de lenghe che si è daûr a doprâ e e ufrirà un spazi une vore util di relacion e di aprofondiment a students e a insegnants. La intenzion e je chê di meti adun une biblioteche complete di sussidiaris par dutis lis classis de scuele dal oblic.

“Cun Lenghis - al sclariis il president de ARLeF, Eros Cisilino - la Agenzie, la Regjon e l'Usr a vuelin dâ un contribût in plui ae domande dai insegnants di podê doprâ struments didattics modernis, di difusion facile e modulabii su la fonde des competencis sedi dai arlêfs che dai insegnants.”

“Al à grandis potenzialitâts e une utilitât impuartante pai insegnants no dome di furlan, ma di dutis lis lenghis – e dîs Patrizia Pavatti -. Chest al è il mût miôr par no isolâ la lenghe furlane, e par insuazâle intun contest educatîf plurilengâl, insiorât in maniere direte dai insegnants, cu lis lôr esperiencis”.

“Lenghis - al marche Cescje - al sarà util par ducj chei che a varan la curiositât di sperimentâ un program viert, moderni e interessant pal aprendiment di dutis lis competencis linguistichis par ogni discipline e par ogni nivel di percors scolastic.”



Di man çampe:
Patrizia Pavatti dirigjente dal Usr,
Eros Cisilino president de ARLeF